

Leipzig, 12. Juni 1572

Von Joachim Camerarius d. Ä.

Druck: Camerarius, Epistolae S. 493f.

S. D. Vnus ex scolasticis nostris fecit mihi pergratum, cùm mihi indicauit litteras hinc ad te mittendi occasionem: etsi miseram iam hoc anno vnas atque alteras, quibus praecipuè egi gratias de dono Demosthenis tui mihi missi. Significaui etiam mea Ethica adhuc detineri Basileae ἀνέκδοτα, ante triennium illuc missa. Quanti igitur nostra fiant, apparet. Modò in absoluendis notationibus περὶ τῶν ἐν ταῖς πράξεσιν elaborabamus, vt caeteris illae adderentur, ἵνα ὁ πόνος εἴη ἐκεῖνος ὀλόκληρος. Mei morbi tentationes fuere hoc anno 73. procedente aetatis meae perquam saeuiae. Et modò πάνυ τοι εἶχομεν ἐπισφαλῶς. Te more tuo vel iam esse, vel mox fore in thermis arbitrabamur. Quae sanè à me quoque frequentarentur, neque ἀνωφελίμως, vt puto, si proprius abessemus, vt olim cùm Tubingae viximus. Quam quidem vrbem pestilentiae contagionibus grauissimè afflictam esse audiebatur, neque de Academia illa quid fieret, habebamus quicquam exploratum. De qua non possumus non esse solicieti: in illa enim et nos aliquando laudem decusqüe gessimus. Veteres amicos nullos ibi me habere reliquos existimo, praeter fortasse Cl[arissimum] V[irum] D. Scheggium. Martinus Crusius aliquoties mihi scripsit, sed ab hoc longo tempore nihil accepimus litterarum, vt quid eo fiat, verear. Apud nos boni se coniungere student aduersus turbulentorum conatus, et illorum iniurias atque vim, si propulsare nequeant, ferre et tacere intelligunt esse optimum. Ita fortasse deinceps minus erit ἐριστικῶν καὶ στηλιτευτικῶν libellorum. Hodie ante lucem praeterijt illustriss[imus] Princeps El[ector] oppidum nostrum, proficiscens, vt ferebatur, in Hassiam. Totum comitatum vnā cum ipso cissijs vehi dicebatur. Te bene valere cupio. Vale. Lipsiae. 12. D[ie] M[ensis] Junij. 72.